

INTERVJU

Goran Zubac, direktor Državne agencije za istrage i zaštitu

Priče o državnom udaru su gluposti!

Mnogi koji su se sad isturili ne brane Budimira nego sebe • Kriminalci godišnje otmu od države jedan cijeli budžet
• Ako Austrija kaže da su imali štetu, da je neko uzeo 32 miliona eura, neko će morati za to odgovarati

Razgovarao:
Sead NUMANOVIĆ

Goran Zubac, direktor Državne agencije za istrage i zaštitu (SIPA), dao je ekskluzivni intervju za „Dnevni avaz“ nakon jedne od najvećih akcija protiv organiziranog kriminala i korupcije u BiH. Zubac najavljuje da će ova agencija nastaviti raditi svoj posao te da pri tome neće biti nedodirljivih. On ističe da je to najbolje pokazala posljednja akcija.

- SIPA radi po svim pitanjima iz svoje nadležnosti, a poseban nam je prioritet borba protiv organizovanog kriminala, finansijskog kriminala, terorizma i korupcije. Radi se o ogromnom broju predmeta na kome su angažovani svi naši potencijali. Kada sam postavljen na dužnost, prije godinu, obećali smo da ćemo dati najveće akcije u BiH i to se sada počinje ostvarivati - kaže Zubac.

Poznata imena

□ **Kako možete potkrijepiti tu svoju tvrdnju?**

- Pokrenuli smo najveću operativnu akciju „Lutka“ u oblasti organizovanog kriminala. Mislim da smo do sada realizovali oko 30 posto plana te akcije i rasvijetlili smo već 12 ubistava i jedno ubistvo u pokušaju, najveću pljačku do sada. I idemo dalje.

Najveća akcija u oblasti finansijskog kriminala su „Boss“, „Panama“, a bit će ih i još. I tu će biti vrlo konkretnih aktivnosti i javnost će vidjeti da smo dosljedni, da istinski mislimo da se obračunamo s kriminalom i korupcijom i da ni tu neće biti nedodirljivih. Osujetili smo neke terorističke aktivnosti, za šta smo dobili i priznanja FBI-ja. Sada smo

napravili najveću akciju iz oblasti organizovanog kriminala i korupcije.

□ **Govorite o hapšenju Budimira i saradnika?**

- Tako je! I nije samo Budimir. SIPA je podnijela ogroman broj izvještaja o počinjenom krivičnom djelu iz oblasti korupcije protiv državnih javnih preduzeća, odgovornih lica, protiv ministarstava, ministara, njihovih zamjenika i pomoćnika... Sve su to visoke poznate ličnosti. Tužilaštvo sada rješava te prijave, a radi se o obimnim finansijskim istragama. Samo u nekoliko mjeseci prošle godine podnijeli smo nekoliko izvještaja o pranju novca „teških“ više od 30 miliona KM. U izvještajima su navedena i imena odgovornih lica. Nastavljamo dalje i nema stajanja.

□ **Koje su to osobe?**

- O imenima ne bih govorio. Ono što želim reći je da radimo i da nismo umorni. Narodskim rječnikom kazano - ko je krao, odgovarat će, pa ma kako se zvao i na kojoj poziciji bio. Nama je bitno, to je naša zakletva, naša obaveza i naš način rada - striktno poštivanje zakona. Neće biti niti ima dirigovanih istraga, a neće se ni krivci moći izvući.

□ **Šta ste konkretno uradili u operaciji „Lutka“, a rekli ste da je oko 30 posto planiranih aktivnosti iz te akcije realizirano?**

- „Lutka“ će se raditi još najmanje dvije godine. Razbili smo jednu organizovanu grupu, sada se okrećemo prema drugoj i trećoj. Tu imamo ekipe Darka Eleza, Ždrale i još nekih. Ali, pustite da prvo uradimo, pa da pričamo. Kada se, za dvije godine, suočimo s javnošću, onda mislim da ćemo moći reći da je to bila najveća

akcija protiv organizovanog kriminala u cijelom regionu. Ponavljam - ništa neće ostati nerazjašnjeno! Morat će se otkriti i ko su izvršio, ko nalogodavci i koji su motivi. I pokazat će se da sve što radimo nije parada za javnost, već istinska borba protiv kriminala.

Nestaje novac

□ **„Boss“ i „Panama“, kakvi su konkretni učinci tih akcija?**

- Nije pitanje koliko je budžet BiH oštećen u ovom momentu. Akcija traje i ona jeste složena i obimna. No, mogu reći da je, čim je akcija počela, u budžet BiH stiglo dodatnih 30 miliona KM prihoda od PDV-a na tekstil. I to je samo djelimičan podatak. Ali pokazuje da je bilo efekta. „Panama“ je već do sada pokazala i to smo dokumentovali da je budžet BiH oštećen za nekih 9 miliona KM. Želim istaći da je u obje akcije jasno ustanovljen način rada kriminalnih grupa. Pogledajte ovaj slučaj: BiH, Federacija traže nekih 70 miliona KM od MMF-a da bi zakrpili budžetske rupe. A mi imamo jedno lice, u obliku ministarstva, ili jednu grupu koja je državu oštetila za toliko novca...

□ **Mislite na Lijanoviće?**

- Nisam ništa rekao. Ali, evo, izgleda vi, pa i svi u BiH, prepoznajete šta se radi i šta se dešava. Građani moraju biti strpljivi. Mi idemo studiozno i svi koji su učestvovali u bilo kakvim kriminalnim aktivnostima moraju biti privedeni, procesuirani, bez obzira na kojoj poziciji bili. Tu dileme nema!

Kroz razne oblike kriminalnog djelovanja grupa i pojedinaca - u oblasti organizovanog kriminala - naprimjer, uvoz zaleđenog mesa, vraćanje PDV-a, uvozu i izvozu zlata, fiktivne firme - nestaju ogromne svote novca. Radi se o stotinama miliona KM. Neka gruba procjena je da je u pitanju iznos ravan budžetu BiH.

□ **Je su li na Vas utjecale**

reakcije na hapšenje Budimira? SDA to ocjenjuje svojevrsnim „državnim udarom“, „političkim hapšenjem“...

- Moram reći da su to gluposti! A gluposti se ne komentarišu. Mi radimo profesionalan posao, držeći se striktno slova zakona. Svako ima pravo da komentariše šta hoće. Tako i stranke.

Ovdje se, dakle, ne radi ni o kakvom „državnom udaru“ niti je ova akcija po definiciji to, ma koliko se nekakvi kvazistručnjaci upinjali da dokažu da jeste. Ovdje se radi o vladavini zakona i čistom policijskom poslu. Mnogima bi bilo mnogo pametnije da se okane komentarisanja. Ovdje nema nikakve zavjere. Radi se s kantonalnim i državnim tužilaštvom. Uključene su sudije za prethodni postupak kantonalnog i državnog suda. Uključen je ogroman broj istražitelja. Mogu reći da mnogi koji su se sad isturili ne brane Budimira nego brane sebe!

□ **Zašto?**

- Mislim da postoji strah od toga šta je sljedeće i šta će SIPA uraditi. A sljedeće je da nastavimo ovo što sad radimo. Ko je krao - odgovarat će...

□ **A takvih ima i u SDA, koja, uostalom, i brani Budimira?**

- Mene ne zanima ko je u kojoj partiji. Uostalom, i sada smo dokazali da nas ne zanima ko je na kojoj poziciji i u kojoj partiji. Neko se ogriješio o zakon i za to mora odgovarati.

Dobra saradnja sa OSA-om

- Na svim istragama, uključujući i one usmjerene protiv kriminala i korupcije angažovani su vrhunski profesionalci, ne samo SIPA-e već i drugih institucija. Posebno želim istaći saradnju koju imamo s Obavještajno-sigurnosnom agencijom (OSA), koja nam pruža izuzetnu podršku i pomoć, kaže Zubac.

□ **Postoje li za Budimira nepobitni dokazi za ovo šta mu se stavlja na teret?**

- Pa niko ne ide grlom u jagode! Čim su tužiocu BiH i kantonalni tužiocu dali zeleno svjetlo za akciju, sudije odobrile pritvor, onda je jasno da raspolažu dovoljnim dokazima. Nemojte očekivati od mene da govorim o konkretnim dokazima.

□ **Nikako da konkretno odgovorite kada su Lijanovići u pitanju...**

- Pazite, mi smo uradili svoj posao, svoj posao zajedno s nama radi Tužilaštvo... Ako neko nije lišen danas, ne znači da će sutra biti na slobodi. Pravda dolazi po svoje.

□ **Radite li slučaj „Hypo banke“?**

- U ovom momentu ne bih govorio o konkretnim predmetima. Vjerujte da se radi na ogromnom broju predmeta. Svaki predmet koji treba ili se radi ili će se raditi. Ako Austrija kaže da su imali štetu, da je neko uzeo 32 miliona eura, neko će morati za to odgovarati.

Nema pritisaka

□ **Imate li problema s politizacijom aktivnosti SIPA-e?**

- Ne! Radimo na osnovu dokaza, operativnih podataka i, iznad svega, na osnovu zakona. Nikada nisam imao nikakvih problema, pritisaka, niko ne može reći da SIPA sada radi jedan predmet, a drugi je gurnula u stranu...

□ **Nemate pritisaka?**

- Da! Niko nam ne sugerije šta ćemo ili nećemo raditi.

□ **Amerikanci Vam nisu rekli da uhapsite Budimira, kako neko napisao ovih dana?**

- Ma to su gluposti! Nema ni govora. Niko, otkako sam u SIPA-i, nije pokušao nametati ništa. Ni domaći ni stranci. Sa svima imamo korektno odnose, s Američkom ambasdom imamo odličnu saradnju, oni nam pomažu na svaki način samo s jednim ciljem - da radimo kako sada radimo. Ipak, moram izdvojiti izuzetnu saradnju koju imamo s OSA-om. Sa strancima pričam samo o tome kako da SIPA bude jača. I oni su izuzetno zainteresovani da i SIPA bude jaka. Dakle - nema diktata!



ZUBAC:
„Lutka“ će se pokazati kao najveća akcija protiv kriminala u regionu

Nisu sve vehabije teroristi

- Nakon dolaska u SIPA-u, rekli smo da trebamo preventivno djelovati da ne bi došlo do terorizma. U javnosti se stvara dojam da je broj terorista ogroman, da su sve vehabije teroristi... A nije tako! Nisu sve vehabije teroristi.

Mada među njima ima onih koji zagovaraju takav način djelovanja. Ne bih govorio koji je to broj ljudi.

Mislim da smo zajedničkim aktivnostima nas i OSA-e izveli neke preventivne aktivnosti. Naravno da u javnosti to i nije toliko zapazeno, jer se, hvala Bogu, nije ni desilo. No, pokazali smo da možemo i tu djelovati. Mislim da smo s OSA-om imali tri akcije koje su uspjele. Sve je dokumentovano i proslijeđeno nadležnima - kaže Zubac.